

दिनांक 03.10.2025

समय: 18.45 बजे

आकाशवाणी जयपुर-अजमेर

समाचार

- सेना प्रमुख जनरल उपेंद्र द्विवेदी कह्यो- आवता बगत मांय पाकिस्तान री हिमायत ऊँ भारत मांय आतंकी वारदातां व्हेवण री सूरत मांय वां ने गंभीर नतीजा भुगतणा व्हेला।
- प्रधानमंत्री नरेंद्र मोदी रो काल नई दिल्ली ऊँ 62 हजार करोड़ रुपया ऊँ बत्ता खर्च वाळी नौजवानां माथे आधारित पहलां री सरुआत करण रो कार्यक्रम।
- वित्तमंत्री निर्मला सीतारामन कह्यो-दुनिया री अस्थिरता बीचे भारत री माली व्यवस्था लचीली-विकसित भारत बणावण सारु जीडीपी मांय 8 फीसदी री रेट ऊँ बधोतरी माथे जोर दीनो।

अर

- राज्य मांय लगाया जा रह्या सेवा शिविरां रा तैत हाल ताई 11 हजार ऊँ बत्ता पट्टा जारी करी ज्या-3 लाख ऊँ बत्ता पशु पालकां ने ही फायदो मिल्यो।

000

सेना प्रमुख जनरल उपेंद्र द्विवेदी पाकिस्तान ने भारत रे खिलाफ़ किण ई भांत री हिमाकत करण परां और करड़ी कार्यवाही सारु चेतायो है। जनरल द्विवेदी आज श्रीगंगानगर कने सरहदी गाँव 22 एमडी मांय एक फौजी चौकी माथे फौजियां ने सम्बोधित कर रह्या हा। वे कह्यो के देश हर आतंकी हमला रो जवाब देवण सारु पूरी तरह तैयार है अर अब आतंकी हमलो व्हेवण री सूरत मांय दुश्मन ने और करड़ो जवाब दियो जावेला।

जनरल द्विवेदी कह्यो के ऑपरेशन सिंदूर रे दौरान फौज ने देश री जनता री पूरी हिमायत मिली जिण ऊँ वां रो हौसला बुलंद रह्या। सेना प्रमुख कह्यो के फौज री कार्रवाई रा महत्त्व ने ध्यान राखता थकां प्रधानमंत्री नरेंद्र मोदी इण ने ऑपरेशन सिंदूर नाम दीनो हो। वे कह्यो के पाकिस्तान मांय आतंकी समूहां रा 9 ठिकाणा नष्ट करणो ऑपरेशन सिंदूर री खास सफलता ही।

ई मौके सेना प्रमुख ऑपरेशन सिंदूर रे दौरान बेहतरीन काम सारु तीन अहलकारां अर केई जवानां रो मान कीनो।

000

प्रधानमंत्री नरेंद्र मोदी रो काल नई दिल्ली ऊँ 62 हजार करोड़ रुपया ऊँ बत्ता खर्च वाळी नौजवानां सारु बणायी ज्यी पहलां री सरुआत करण रो कार्यक्रम है। नौजवानां रा कौशल

विकास री ऐतिहासिक पहल रा तैत, प्रधानमंत्री देश भर रा एक हज़ार सरकारी आईटीआई संस्थानां ने और बेहतर बणावण सारू पीएम-सेतु री सरूआत करेला।

000

वित्त मंत्री निर्मला सीतारमण ने विकसित भारत रो लक्ष्य हासिल करण सारू सकल घरेलू उत्पाद-जीडीपी मांय बधोतरी री 8 फीसदी रेट माथे जोर दीनो है। वे आज नई दिल्ली मांय राख्यी ज्या कौटिल्य आर्थिक सम्मेलन रा उद्घाटन सत्र मांय बोल रही ही। श्रीमती सीतारमण कह्यो के मौजूदा दौर मांय दुनिया री अस्थिरता बीचे घरेलू कारणां ऊँ देश री विकास दर मज़बूत बण्योड़ी है।

000

प्रधानमंत्री नरेंद्र मोदी कानी ऊँ ऐलाण करी ज्या जीएसटी बचत उत्सव रो जनता ने फायदो मिल रह्यो है। जी.एस.टी. सुधार रा तैत छोटी कारां माथे जी.एस.टी. री रेट 28 ऊँ घटा र 18 फीसदी कर दीरीजी है, जद के 350 सीसी ताई री दो पहिया वाळी गाड़ियां माथे कर री रेट 28 ऊँ घटा र 18 फीसदी कर दीरीजी है।

000

लोकसभा अध्यक्ष ओम बिरला कह्यो है के प्रधानमंत्री नरेन्द्र मोदी री अगुवाई मांय देश खुद रे पाण ऊबो व्हेवण ओड़ी तेज़ी ऊँ आगे बध रह्यो है। श्री बिरला आज जयपुर मांय राख्यी ज्या राज्य स्तर रा एक जळसा मांय बोल रह्या हा। वे कह्यो के नौजवानां ने चोखी सीख अर संस्कार मिलणा चाहिजे। लोकसभा अध्यक्ष कह्यो के सरकार नौजवानां री हर चुनौती रो सामो करण सारू वां सागे ऊबी है।

ई मौके भारतीय जनता पार्टी रा प्रदेश अध्यक्ष मदन राठौड़, विधायक बालमुकुंदाचार्य, जगद्गुरु शंकराचार्य प्रज्ञानानन्द सरस्वती समेत केई हस्तियां मौजूद ही।

000

केंद्रीय गृह अर सहकारिता मंत्री अमित शाह कह्यो है के देश रा डेयरी हलका मांय लारला 11 साल मांय 70 फीसदी री जबरदस्त बधोतरी व्ही है। वे आज आईएमटी रोहतक मांय साबर डेयरी रा नुवा कारखाना का उद्घाटन रे मौके बोल रह्या हा। श्री शाह कह्यो के सरकार साल 2028-29 ताई रोजीना दूध री खरीदी बधा र एक हज़ार लाख मीट्रिक टन करण री कोशिश कर रही है।

000

सहकारिता राज्य मंत्री गौतम कुमार दक कह्यो है के राज्य मांय नुवी ग्राम सेवा सहकारी समितियां बणावण री प्रक्रिया ऑनलाइन कर दीरीजी है। वे कह्यो के नुवी व्यवस्था ऊँ समितियां बणावण रो काम तेज़ व्हेला अर इण मांय साफगोई आवेला।

000

प्रदेश मांय लगाया जा रह्या शहरी सेवा शिविरां मांय जनता री समस्यावां रो तेज़ी ऊँ निपटारो कर्यो जा रह्यो है। आं शिविरां मांय हाल ताई 11 हजार 156 पट्टा जारी कर दिया ज्या है अर सामाजिक सुरक्षा पेंशन योजना रा तैत पेंशन लेवण वाळा 74 हजार ऊँ बत्ता लोगां री पिछाण करी ज्यी है। स्वास्थ्य सेवावां रे जरिए 1 लाख 49 हजार ऊँ बत्ता जणा रो ईलाज करी ज्यो। ई सागे ई मुख्यमंत्री स्वनिधि योजना रा तैत 1 हजार 131 जणा ने कर्ज मंजूर करी ज्या। ग्रामीण सेवा शिविरां मांय ई पशुपालकां ने खूब फायदो मिल रह्यो है। पशुपालन विभाग रा निदेशक डॉ. आनंद सेजरा बतायो के आं शिविरां ऊँ हाल

ताई 3 लाख 34 हजार ऊँ बत्ता पशुपालकां ने फायदो मिल्यो है। वे बतायो के 8 लाख 44 हजार ऊँ बत्ता ढांढा— ढोरां रो ईलाज करी ज्यो अर 3 लाख 93 हजार ऊँ बत्ता जिनावरां रे टीका लगायी ज्यो। आं शिविरां रो मार्फत 1 लाख 10 हजार ऊँ बत्ती मुख्यमंत्री मंगला पशु बीमा पॉलिसी ई बांटी ज्यो। पाली जिला मांय सुमेरपुर हलका रा मणिहारी मांय आज लगायी ज्यो ग्रामीण सेवा शिविर रो कैबिनेट मंत्री जोराराम कुमावत अर जोधपुर री संभागीय आयुक्त प्रतिभा सिंह दौरो कीनो। ई मौके वे पात्र लोगां ने पट्टा अर चैक दीना। वे गांव वाळां री परेशानियां ई सुणी अर अहलकारां ने वां रो निपटारा सारू जरूरी हुकम दीना।

000

प्रदेश मांय मनाया जा रह्या वन्यजीव सप्ताह रा तैत जंगली जिनावरां ने बचावण रा बारा मांय जाग जागवण सारू सरकारी अर गैर—सरकारी संगठनां री ओर ऊँ भांत—भांत रा कार्यक्रम राख्या जा रह्या है। म्हाणा सवाईमाधोपुर खबरनवीस बतायो के वठे वन विभाग री ओर ऊँ बाघ परियोजना हलका रा गांवां मांय जाग जगावण सारू लगातार कार्यक्रम चलाया जा रह्या है।

-----

भरतपुर रा केवलादेव राष्ट्रीय उद्यान मांय ई बच्चां ने सैर करायी ज्यो अर जंगली जिनावरां ने बचावण अर जैव विविधता रा बारा मांय जाणकारी दीरीजी। ई दौरान पर्यावरण ने संतुलित राखण सारू बत्ता ऊँ बत्ता पौधा रोपण अर परिन्दां अर जंगली जिनावरां ऊँ प्रेम करण बाबत् कही ज्यो।

000

पाली री कृषि मंडी मांय बीज सर्टिफिकेशन करावण रो दफ़्तर बणावण रो काम बेगो ई पूरो व्हे जावेला। ई पाछे पाली, जालौर अर सिरोही जिलां रा किसान वठे ई बीजां ने प्रमाणित करा सकेला अर वां ने बीजां री गुणवत्ता री जाँच अर प्रमाणन सारू जोधपुर जावण री जरूरत नी व्हेवेला। इण ऊँ जुड़्या अहलकार लक्ष्मण बैरवा बतायो के नुवा दफ़्तर मांय किसानां ने बीजां री गुणवत्ता री जाँच सागे बेहतर उपज लेवण री सिखावण ई दी जावेला। म्हाणा खबरनवीस बतायो के ई खबर ऊं आं तीन ई जिलां रा किसान घणा राजी है।

-----

000